



Inatsisartunut ilaasortaq, Aqqaluaq B Egede
Maani/-

§ 37 naapertorlugu apeqquteqaammut nr. 123-2018-imut akissutit

Ulloq: 27-06-2018
Suliap normua 2018 - 13514
All nr: 8160789

Inatsisartut suleriaasissaanni § 37-mi imm. 1 naapertorlugu Naalakkersuisunut aalisarneq pillugu inatsimmut tunngasumik apeqquteqarsimavutit. Apeqqutigineqartut uannit akisassanngortinneqarsimapput.

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanaq.gl
www.naalakkersuisut.gl

Naalakkersuisunut apeqqutigisatit:

1. Aalisarnermut inatsisissatut siunnersuut siullermeerneqareersoq Inatsisartut suleriaasiat naapertorlugu aatsaallu Inatsisartuni siullermeeqqissasoq Naalakkersuisut isumaqatigaat?

Akissut: Inatsisartut Naalakkersuisullu pillugit Inatsisartut inatsisaannut imaluunniit Inatsisartut suleriaasiannut innersuussisoqaraluarpalluunniit atuuttoq tassaavoq inatsisissatut siunnersuut suli Inatsisartuni naammassillugu suliarineqaranilu akuersissutigineqanngitsoq qinersinissamik suaruteqarnermi ingerlaannartumik atorunnaartarmat. Naalakkersuisut Inatsisartunut nutaanut inatsimmik taassuminnga assingusumilluunniit saqqummiusseqqinniarlutik aalajangerunik inatsisissatut siunnersuutitut nutaatut aallaqqaataaniik taava saqqummiunneqassaaq.

2. Aalisarnermut inatsisissatut siunnersuut Naalakkersuisuniit sutigut qanorlu allanngortinniarneqarpa?

Akissut: Apeqqutit sinneri Naalakkersuisunit aalisarnermut inatsisissatut siunnersuutissap nutaap sunik imaqarnissaanut aamma kingunerisassaanut tunngapput. Apeqqutitut taakkununga tunngatillugu isumaqarpunga Naalakkersuisut Inatsisartut Siulittaasoqarfiannut inatsisissatut siunnersuummik tunniussinissaata tungaannut Naalakkersuisut inatsisissatut siunnersuummik ilusilersuillutik suliaqarnerat Naalakkersuisut susassaqarfiattut isigineqartariaqartoq. Tamanna tunuliaqataralugu isumaqarpunga apeqqutit sinneri akinissaannut tunngavissaqarnanga.

Inussiarnersumik inuulluaqqusillunga

Erik Jensen

Aalisarnermut, Piniarnermut Nunalerinermullu Naalakkersuisoq

INUIT ATAQATIGIIT

Inatsisartuni



20. juni 2018

Inatsisartut suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

Naalakkersuisunut apeqquut:

- 1. Aalisarnermut inatsisissatut siunnersuut siullermeerneqareersoq Inatsisartut suleriaasiat naapertorlugu aatsaallu Inatsisartuni siullermeeqqissasoq Naalakkersuisut isumaqatigaat?**
- 2. Aalisarnermut inatsisissatut siunnersuut Naalakkersuisuniit sutigut qanorlu allanngortinniarneqarpa?**
- 3. Aalisarnermut inatsisissaq naalakkersuisuniit allannguuteqartinneqassappat aningaasatigut kingunissai nutaamik naatsorsorneqarsimappat?**
- 4. Aalisarnermi inatsisissatut siunnersuut nutaaq sammineqassappat nunatsinni aalisartut raajarniartut akuersissutaatillit pisassaattillillu amerlinissaat siunertarineqarpa?**
- 5. Ingerlatseqatigiiffiit raajanik aalisartuusut ingerlalluarnermikkut nunatta karsianut aningaasanik isertitsilluarfiusarnera qanoq allannguuteqassasoq Naalakkersuisuniit naatsorsuutigineqarpa?**
- 6. Naalakkersuisut aalisarnermut inatsisissaq pingaaruteqarluinnartoq pillugu nutaamik paasissutissiissutigisariaqartumik saqqummiussassaqarpap?**
- 7. Sinerissap qanittuani rajarniarluni aalisarneq pillugu aalisarfigeqqusaasup avasinnerpaartaatut killiliusseq aamma kangerlunni aalisarsinnaaneq allannguutini ilanngunniarneqarpap?**
- 8. Avataasiorluni raajarniarnermi sinerissamiit avasissutsimut killiliusseq allanngortinniarneqarpa?**
- 9. Raajat ukiumut pisassiissutaasartut (TAC) siunissami pisassat ilai kommuninut pisassiissutinngortinneqarsinnaanerap Naalakkersuisut isumaqatigaat?**
- 10. Kommunit raajanik pisassiissutinik (TAC) ilaannamininnguanilluunniit pisassinneqartalissappata kommunit innuttaasalu aningaasaqarnikkut siuariaatigissammassuk Naalakkersuisut soqutigalugu suliarisinnaanerpaat?**

11. Aalisarnermut Inatsisissatut siunnersuut sinerissap qanittuani 15%-it sinnerlugit pisassaatillit pisassaataat utertinneqartussat ataatsimut katillugit raajat tonsinut qassinut naatsorsorneqarpat?

12. Aalisarnermut Inatsisissatut siunnersuut avataasiortuni 33,3%-it sinnerlugit pisassaatillit pisassaataat utertinneqartussat ataatsimut katillugit raajat tonsinut qassinut naatsorsorneqarpat?

13. Aalisarnermut Inatsisissatut siunnersuut ingerlatseqatigiiffinnut, tunitsivinnut, aalisartunut aamma nunatta avataanut niuernermit sunniuteqartussaq sulisartoqarnikkut qanoq sunniuteqartussaannersoq misissorneqarsimava?

14. Nunatta avataanut raajanik tunisaqarnerpaanissatsinnut niuernikkullu aningaasanik isertitaqarnerpaanissatsinnut innarliinnginnissaq pillugu Naalackersuisut qulaajaanernik pingaarutilinnik ingerlatsisimappat?

(Inatsisartuni ilaasortaq Aqqaluaq B. Egede, Inuit Ataqatigiit)

Tunngavilersuut:

Inatsisartut Naalackersuisullu aalisarnermut inatsisissatut siunnersuummik sammisaqarnissaat nunatta inuisalu aningaasaqarnikkut sulisartoqarnikkullu atugaannut attuumassuteqarluinnarmat sukumiisumik Naalackersuinikkut sulisoqarsimanersoq, aamma qulaajagassat imaannaanngitsut arlaqartut pisariaqartullu pillugit apeqquteqarnissaq avaqqukkuminaappoq. Tamannalu tunngavigalugu apeqqutit qulaani sammisakka Naalackersuisuniit erseqqissumik akineqarnissaat pisariaqartippara.

Aalisarnermut Inatsisissaq sutigut tamatigut qulaajaaqqissaarsimalluni sammineqarnissaa pingaarnertut suliaasaasutut isigaara. Pingaarnepaajunngilaq sukkanerpaamik suliarinissaa. Pingaarnepaajuvoq sukumiisumik, piffissaqarluni, misissuilluarsimallunilu kukkussutaasinnaasunit pinngitsoortitsiniarsimalluni sulisoqarnissaa. Tamannalu Naalackersuisuni malinneqarsimanersoq paasiniallugu apeqqutit qulaani allassimasakka nassiuppakka.

Neriullunga Naalackersuisut suliaasaq pingaaruteqarluinnartoq pitsaasumik misissuisimallutik, aamma apeqqutit pingaarutillit sapinngisamik tamaasa akissuteqarfigisinnaallugit paasissutissanik katersisimassasut. Inuussutissarsiut pingaarutilerujussuaq illersorsinnaasumik suliarineqarnisassamat.

Apeqqutit ullut qulit qaangiutsinnagit akineqarnissaat kissaatifgaara.